

SCRIPT OF MORNING GOJRI NEWS BULLETIN 8NOV 2025 1015HRS

مارننگ گوجری نیوز بولینٹن 8 نومبر 2025

یوہ آکاشوانی جموں بے باغ علی طاہرتیں خبر سنو۔

PM CONFERENCE LEGAL AID

وزیر اعظم نریندر مودی اج شام سپریم کورٹ مانہ قانونی امداد مہیا کران غا طور طریقان نانہ مضبوط بنان بارے قومی کانفرنس غو افتتاح کریں غا وے قانونی خدمات بارے قومی اتھارٹی این اے ایل ایس اے غی طرفوں تیار کیا گیا سماجی ثالثی کا طریقہ ور مبنی تربیتی پروگرام غی شروعات کریں گا اس موقع ور وزیر اعظم اک عوامی اکٹھ سنگ خطاب وین کریں غا دو روزہ غا اس کانفرنس غے دوران قانونی خدمات غا اٹانچہ گا اہم پہلوواں ور غور کیو جائیگو جن مانہ قانونی امدادی دفاعی کونسل نظام وکیلاں گا پینل نیم قانونی رضاکار مستقل لوک عدالت تے قانونی خدمات اداراں غا مالی بندوبست وغیرہ شامل وین گا۔

Kupwara Encounter

وادی کشمیر غا کپواڑہ ضلع غا کیرن سیکٹر مانہ اج سلامتی دستاں تے دہشت گردان ہشکار ہوا اک ٹاکرا مانہ 2 دہشت گرد مارا گیا ہیں۔ یوہ ٹاکرو اُس ویلے شروع ہوؤ جد سلامتی دستاں نے اک در اندازی غی کوشش بارے پکی سولن تیں بعد سانجھی تلاشی کا روائی شروع کی تھی۔ جس دوران دہشت گردان نانہ للکارن ور اُن نے بلاشتعال گولی باری شروع کر دی۔ جوابی کا روائی مانہ 2 دہشت گردان نانہ مار مکا یو گیو۔ علاقہ مانہ تلاشی کا روائی جاری ہے۔

VANDE MATRAM YATRA

بھارت غا قومی ترانہ وندے ماترم لکھیا جان غا 150 سال مکمل ہون ور پورا جموں صوبہ مانہ ایکتا تے حُب الوطنی غا جذبہ سنگ جشن منایو جارہیو ہے مرکزی وزیر ڈاکٹر جتندر سنگھ نے بھارت پاکستان سرحد غے نال نال ضلع کٹھوعہ مانہ وندے ماترم گا 150 سال مکمل ہون غا سلسلہ مانہ پتھ یاترا شروع کی یاہ یاترا ضلع گا لونڈی گراں تیں شروع ہوئے سرحدی چوکی تپان غا مقام ور اختتام پذیر ہو گئی بی ایس ایف نے طالب علماں شہریاں تے عہدیداراں غی طرفوں شروع کی گئی اس پتھ یاترا غو سواگت کیو یاترہ مانہ شریک شہریاں طالب علماں تے عہدیداراں نے 100 میٹر لمو ترنگو چایو ووتھو تے وے حُب الوطنی غانعرا لارہیا تھا ات موجود اک عوامی اکٹھ سنگ خطاب کرتا واں ڈاکٹر جتندر سنگھ نے کہیو کہ جے سرحدی گرایاں غا بسنیک قوم غا پہلا سپاہی این اُنہاں نے وندے ماترم نانہ قوم غو فخر تے ایکتا غی علامت قرار دتو۔

CS AADHAR

چیف سیکرٹری اٹل ڈلو نے کل یو آئی ڈی اے آئی نفاذ کمیٹی غی میٹنگ غی صدارت کرتا واں ادھار تے ماحولیات نظام غی مضبوطی ور مبنی اقدامات غو جائیزو لیو اس موقع ور دسیو گیو ہے جے یوٹی مانہ 93 فی صد ادھار غی کاروائی مکمل کرلی گئی ہے تے اس راہ 1 کروڑ 26 لکھ ادھار نمبر تیار کرلیا گیا ہیں۔ چیف سیکرٹری نے اس موقعور 5 براں توڑی گا بچاں گا ادھار نمبر تیار کرن بارے ترجیح دین غی ہدایت کی نالے بایومیٹرک نانہ تا تاریخ بنان غا عمل مانہ تیزی لیان تے کہیو آر خوڑ ور مبنی سرٹیفکیٹ تیار کرن غا عمل نانہ اپنان غی ضرورت ورزور پایو تانجے شفافیت نانہ یقینی بنایو جاسکے اُنہاں نے ہدایت کی ہے جے تمام ضلعان سکولان تے آنگن واڑی مرکزان مانہ اندراج غی خاطر خصوصی کیمپ لاویں یو آئی ڈی اے آئی غی طرفوں برا مزیدی مقامات چہرہ شناخت بارے تجویز رکھی گئی جد کہ ادھار سیوا مرکز نالے بہتر شناختی نام بارے وی تجویز رکھی گئی ہے تانجے جموں کشمیر مانہ خدمات مہیا کران غا نظام نانہ مضبوط بنایو جاسکے۔

FILM FESTIVAL

سینما تے ثقافت غو جشن منایا جان غا سلسلہ مانہ اک ہفتہ توڑی منایا جان آلو پنجووں کشمیر عالمی فلم میلو کل ٹیگور حال سرینگر مانہ اختتام پزیر ہو گیو اس میلہ غا ڈائریکٹر مشتاق علی احمد خان غو کہنو تھو جے اس فلم میلہ مانہ بھارت تے دوجا ملکان غی 60 فلم غی نمائش کی گئی جس مانہ بکھ بکھ موضوعات تے زبانان غی فلماں نانہ دسیو گیو تمام ضمراں غی فلماں بارے انعام وی دتا گیا جن مانہ فیچر فلم دستا ویزی فلم تے متحرک فلم شامل ہے عہدیداران غو کہنو تھو جے اس میلہ غا انعقاد سنگ نہ چھڑو سینما بارے صلاحیتاں نانہ باہدو مل سکے گو بلکہ اس نال کشمیر غی قدرتی خوبصورتی غی نمائش غے نال نال فلم کاران تے سیلانیان نانہ راغب کیو جاسکے گو تے اس راہ علاقہ غا ثقافتی تے قدرتی صلاحیتاں غا رابطہ دنیا سنگ قائم ہون مانہ مدد ملے غی۔

JMU BSF MARATHON

پہلی واری جموں مانہ بی ایس ایف میراتھن 2025 گو انعقاد کیو جارہیو ہے جہرو سرحدی مرکزی دفتر بی ایس ایف جموں غی جانب تیں منعقد ہو رہیو ہے۔ اس مانہ 6 ہزار تیں متی لوکان نے دوڑ مانہ حصو لین واسطے اپنو اندراج کرایو ہے یاہ دوڑ 9 نومبر نانہ بی ایس ایف کیمپس پلوڑ ہ جموں تیں جاری وے غی۔ میراتھن مانہ 4 قسم غی دوڑ وے غی 42 کلو میٹر، 21 کلو میٹر، 10 کلو میٹر تے 5 کلو میٹر۔ اس مانہ جموں گا سرحدی علاقہ پڑوسی ریاست تے ملک بھرغا لوک حصو لے سکیں۔ پلوڑا کیمپ مانہ اج ایک پریس کانفرنس رکھی گئی تھی جس غی صدارت بی ایس ایف جموں گا انسپکٹر جنرل سشانتک آنند نے کی۔
